



Siverth K. Heilmann

UPA 2020/53 & 54

Atassut

28. april 2022

**Mitit piniarneqartarnerisa sivitsorneqarnissaannik Naalakkersuisut peqquneqarnissaannik
Inatsisartut aalajangiiffigisassaattut siunnersuut.**

Pkt. 53

Aamma

**Kitaani kangianilu piffissami aalajangersimasumi mitit manniinik katersisarnermik
ammaassisoqarnissaannik Naalakkersuisut peqquneqarnissaat pillugu Inatsisartuni
aalajangiiffigisassatut siunnersuut.**

(Inatsisartuni ilaasortaq Jens Napätôq, Naleraq)

Pkt. 54

Siullermik inatsisartuni ilaasortaq Jens Napätôq, Naleraq qulaani marlunnik mitit pillugit
aalajangiiffigisassatut siunnersuuteqarninni Qujanaq, imatullu Atassummiit oqaaseqarfingissavagut.

Piniakkat killilersukkat pineqartillugit, Atassummiit ersarilluinnartumik ukiorpassuanngortuni
piniartut illersorlugit siunnersuuteqartarnigut isummersortarnigut partiinit allaniit
oqariartaasiinnarinngisagut siunnerfigisarsimasattali paasineqalerlutik inatsisartuni
qaqinneqartalermata ajoriinnagassaanngilaq.

Taamaattumik Isorliunerusuniinnarmiluunniit qulequtarineqartumi tunngaviatigut Atassummiit
tapersiinerput oqaatigeriiginnarsinnaavarput. Piniartorpassuit pinngortitaq allanngorartuartup
akiorsinnaanngisattalu naleqqussarfigalugit, piniakkaminnik piujuartitsinissamik
atuilluartuunissaminnillu pingaartitsisuunerat ataaqqisassaavoq.

Siunnersuut qulequtarineqartoq pillugu ilumoorpoq, ukiut ingerlaneranni Mitit piniagaasarneri
ataasiaannnarani nutarterneqartarmata aammalu allaat zone-lersuisariaqalerneq
eqqunneqarnikuulluni. Tamanna pingaartumik kitaani sineriarujussuatsinni aalisarnikkut
piniarnikkullu atugassarititaasut ilaatigut nipisanniarnermi il il allaanerusariaqarneri
tunngavilersuutigineqarmata.

Qanga umiaaraannarsornerup nalaani kiisalu qeqertani sarsuatsiilluni miterniartartunut peqataasarsimanitsuut ukiuni makkunani allatigut atortoqalernerup kingunerisaanik ileqqorisimasaq pisariaqartinneqarnera qaqtiguulersimanissaa qularutissaanngilaq.

Soorunami allatuulli ukiut assigiinngitsut ingerlaneranni miteqassuseq allanngorarsinnaasarnerat malugisarparput. Ippassaaninnguakkunni eqqartorpara Maniitsup umiarsualiviani eqqaanilu miterpassuit sikuuneranik peqquteqartumik perlerartut timmiaqatiminnillu nerisarineqartut.

Oqaatigisariaqarpara umiarsualivipput sikoqanngikkaluarpalluunniit umiatsiatta saninnguani mitiinnaanngitsut akornusersorneqannguaratik uumaniarnerat sungiusimaannalernikuugatsigit, ilami allaat illoqarfik apummik ulikkaartoq keerluntuut ilaat utoqqaat illuata silataani nerisassaannik nerlersorneqarlutik najugaqartunuunnaanngitsoq aliikkutaapput.

Ilisimavara appatuulli mitit piaqqiorfigisartagaat allaanerummata, miterpassuit Nunatta sineriarujussuani qeqertarpassuarnilu piaqqiortarnerat nalinginnaasorujussuuvoq aamma ilumoorerassavara nipesanniarnerup nalaani mitiinnaanngitsut pisarisoorneqartarneri.

Puisilluunniimm qassutaannut aamma kapisillit ukiuunerani nunatsinniit qimagineqarnerartartut pisarineqartarneri nalinginnaavoq, taamaammat tamarmik naammagisaannut inatsisiliorsinnaanngilagut. Atassutip oqaasinnaaraa, pisarisuukkanut unioqquitsisunngortinneqarata, atorluaanissaq iluaqtissanngortinnissaanullu siunertaqarta.

Qangarsuaaniilli mitit mannisarneqartarnerinut atatillugu, mitit qiviunik katersisarneq atugaalluartoq piniartut kattuffianniit KNAPK-mit tapersersugaanera atorluaaninngortariaqarneralu Atassummiit tapersorsimavarput, sulilu pisariaqartitsineq aallaaviatigut tapersorsorlutigu.

Qilalukkat pillugit oqaannarusuppunga, innuttaasut inatsisartullu ilisimavaat, qilalukkanik nungulerneraajuarneq akerlilersorlugu Atassummiit oqaaseqaaterpassuit aninneqartuarmata, sulili Naleraq pilersinnejqanngikkallarmat. Appat avannaani sikueruttorlu piniagaasarneri unitsinnejqartarmata sivitsuinialrulta Atassummiit siunnersuuteqaraluaratta kingumunaasit amerlanerussuteqanngitsoorsimanerput eqqaamasat ilagiinnarpaat.

Taamatut oqaaseqarluta, siunnersuuteqartoq qutsavigeqqillugu qulequtarineqartunut tapersiilluta, suliap aappassaaneerneqartigani ataatsimiititaliamut susassaqartumut ingerlaqqinnissaa Atassummiit tapersiivugut.

Qujanaq.